

Inatsisissatut siunnersuummut nassuiaatit

Nassuiaatit nalinginnaasut1. Aallaqqaasiut

Tunngaviusumik atuarfiit namminersortitat angerlarsimaffimmilu atuartitaaneq il.il. pillugit Inatsisartut inatsisaat nr. 10, 15. april 2003-meersoq malillugu kommunit tunngaviusumik atuarfinnut namminersortitanut tapiissuteqartarnerat pillugu maleruaqqusat erseqqissuunngitsutut paasineqarnerat aallaavigalugu siunnersuut suliarineqarpoq. Tamatumunnga pissutaa-voq, inatsisip atuutilerneraniilli ataatsimoortumik tapiissutit tunniunneqartarnerinut tunngaviit allanngortinneqarsimanerat.

Aammattaaq perorsaанermut tarnillu pissusaannut tunngatillugu siunnersuisarneq immikkullu atuartitsisarneq kommuninit 1. januar 2012-imi tiguneqarnerisa nassataannik allannguuteqartitsinerup kinguneqartinneqarnissaa pisariaqartinneqarpoq, soorlu tamatumunnga atatillugu aningaasaliissutit tamarmiusut aamma nuunneqarsimasut. Tamatuma kinguneranik Namminersorlutik Oqartussat siunnersuinissamik pineqartumik isumaginnissinnaajunnaarput imaluunniit siunnersuineranut aningaasartuutinik utertitsivigineqarsinnaajunnaarput.

Kiisalu siunnersuutigineqarpoq, tunngaviusumik atuarfinni namminersortitani atuartut amerlassusaasa ikinnerpaaffilerneqarnissaat pillugu Naalakkersuisut malittarisassaliornissamut piginnaatinneqassasut.

2. Inatsisissatut siunnersuummi pingaarnertut sammisata) Pisinnaatitaaffiit atuuttut

Inatsisartut inatsisaata atuuttup § 4, imm. 2-ani takuneqarsinnaavoq, Naalakkersuisut atuartunut tunngaviusumik atuarfimmi namminersortitami atuartinneqartunut, perorsaанermut aamma tarnit pissusaannut tunngatillugu akeqanngitsumik siunnersuititsisinnaasut.

Aammattaaq inatsisartut inatsisaata atuuttup § 14, imm. 1-iani takuneqarsinnaavoq, tunngaviusumik atuarfik namminersortitaq minnerpaamik 1. klassimiit 7. klassimut atuartitsinissamik neqerooruteqassasoq. Kisianni atuartut amerlassusissaat, tassunga ilanngullugu ikinnerpaaffissaat pillugit apequt inatsimmi iluarsineqanngilaq.

Aamma inatsisartut inatsisaata atuuttup § 16, imm. 1-ip immikkoortuata aappaani takuneqarsinnaavoq, atuartumut ataatsimut tapiissutit Kalaallit Nunaanni kommunini meeqqat atuarfianni atuartumut ataatsimut Namminersorlutik Oqartussat ataatsimoortumik tapiissutaattut annertussuseqartumik, kommunalbestyrelsip tunngaviusumik atuarfik namminersortitaq ukiumoortumik ingerlatsineranut tapiissuteqarfigisassagaa. Ataatsimoortumilli tapissuteqartarneq maanna atuuttoq aqqutigalu meeqqat atuarfianni atuartut immikkut ittumik anguniagaralugit ataatsimoortumik tapiissutinik tunniussisoqarneq ajorpoq. Akerlianik ataatsimoortumik tapiissuteqartarneq maanna atuuttoq aqqutigalugu meeqqamut atuartumut ataatsimut tapiissutit tunniunneqartarput, taamatulli tapiissuteqartarnermi atuartut kisimik siunertarineqanngillat. Taamaammatt ataatsimoortumik tapiissuteqartarneq maanna atuuttoq inatsimmi tapiissuteqarnissamut aalajangersakkamut tunngatillugu imaaliiallaannaq atorineqarsinnaanngilaq.

Taakkua saniatigut inatsimmi atuuttumi § 16, imm. 2-p takutippaa, perorsaannermut aamma tarnit pissusaannut tunngatillugu siunnersuinnermut atatillugu atuartunik annertusisamik immikkut atuartinneqarnissamut allatullu perorsaannermut aamma tarnit pissusaannut tunngatillugu ikiorserneqartariaqartunut aningaasartuutit Naalakkersuisut utertillugit akilissagaat.

b) Siunnersuut

Siunnersuut tamaat ataatsimut isigalugu qanoq periuseqartarnissamik siunertaqarpoq. Siunertarivaa ataatsimoortumik tapiissutit tunniunneqarnissaannut tunngavissat allanngortinneqaraluartut, tunngaviusumik atuarfiit namminersortitat inatsisip atuutsinneqalernerani naatsorsuutigineqartut annertutigisumik atuartumut ataatsimut tapiissutinik tunniussisoqartuarnissaata qulakkeerneqarnissaa. Taamaammatt siunnersuutigineqarpoq, aningaasat atuartumut ataatsimut ataatsimoortumik tapiissutissat 2008-misut qaffasitsigisut akinut aningaasarsianullu aaqqiissutitallit 2013-imi qaffasissusissaattut amerlatigisut ikineqassasut, tassa siunnersuut 1. januar 2013-imi atuutilissasoq siunnersuutigineqarmat. Tassunga peqatigitillugu siunnersuutigineqarpoq, kommuninut ataatsimoortumik tapiissutit akinut aningaasarsianullu aaqqinneqartarnerisa annertoqqataanik siunnersuummi aningaasat pineqartut akinut aningaasarsianullu aaqqinneqassasut. Aningaasat 2008-misut qaffasitsigisumik akinut aningaasarsianullu aaqqinneqartarnissaannut pissutaavoq, 2008 tassaammatt ukioq kingulleq ataatsimoortumik tapiissuteqariaatsimut inatsisip atuutsinneqalernerani atuuttumut naapertuuttumik ataatsimoortumik tapiissutit naatsorsorneqarfiat.

Perorsaanermut tarnillu pissusaannut tunngatillugu siunnersuisarnerup annertusisamillu immikkut atuartitsisarnerup kommuninit tiguneqarnerisa kinguneranik siunnersuummi aalajangersarneqarpoq, kommunimi tunngaviusumik atuarfiup namminersortitap najugaqarfigisaani kommunalbestyrelse akeqanngitsumik perorsaanermut tarnillu pissusaannut tunngatillugu siunnersuititsisassasoq annertusisamillu immikkut atuartitsinermut aningaasartuutitik utertitsisassasoq.

Taassuma saniatigut siunnersuummi takuneqarsinnaavoq, tunngaviusumik atuarfimmi namminersortitami atuartut amerlassusissaasa ikinnerpaaffissaat pillugu apeqquut nalunaarut aqqutigalugu iluarsineqarsinnaasoq. Tassunga atatillugu siunnersuummi takuneqarsinnaavoq, maleruaqqusat taama ittut tunngaviusumik atuarfinnut namminersortitanut nalunaarutip atuutilereernerani pilersinneqartunut tunngatillugu taamaallaat sunniuteqassasut.

Tunngaviusumik atuarfinni namminersortitani atuartut amerlassusaasa ikinnerpaaffilerneqarnissaat pillugu aalajangersakkat tunngaviusumik atuarfinnut namminersortitanut inatsit malillugu ingerlatsinermut tapiissutisineq ajortunut atuutinngillat.

Kiisalu siunnersuummi aalajangersagaqarpoq, atuartut amerlassusissaasa ikinnerpaaffeqartinneqarnissaannut tunngatillugu siunnersuummi aalajangersaanissamut piginnaatitsissutip atorneqarnissaa, tunngaviusumik atuarfinnut namminersortitanut maleruaqqusat atuutsinneqalernerisa kingorna pilersinneqartunut taamaallaat tunngatinneqassasoq.

3. Aningaasaqarnikkut pisortatigoortumillu ingerlatsinikkut pisortanut kinguneri

Inatsisissatut siunnersuut Namminersorlutik Oqartussanut kommuninulluunniit aningaasaqarnikkut pisortatigoortumillu ingerlatsinikkut kinguneqartinneqanngilaq.

4. Inuussutissarsiuteqartunut aningaasaqarnikkut ingerlatsinikkullu kinguneri

Inatsisissatut siunnersuut inuussutissarsiuteqartunut kinguneqartinneqanngilaq.

5. Avatangiisinut, pinngortitamut innuttaasullu peqqissusaannut kinguneri

Inatsisissatut siunnersuut avatangiisinut pinngortitamullu kinguneqartitsinngilaq.

6. Innuttaasunut kinguneri

Inatsisissatut siunnersuut innuttaasunut kinguneqartitsinngilaq.

Tassunga atatillugu oqaatigineqassaaq, Kommuneqarfik Sermersuup 2009-mili tunngaviusumik atuarfiit namminersortitat angerlarsimaffimmilu atuartitaaneq pillugit inatsit meeqqamut atuartumut ataatsimut kommunip tapiissutisarneranut naleqquttumik inatsit malillugu tapiissutisisussaataitanertut nassuiartaraa. Aningaasat taakkua aningaasanit siunnersuummi takuneqarsinnaasunit qaffasinnerungaatsiarput. Taamaammat kommunip tapiissutigisartagai ikilisinneqarpata, kommunimi tunngaviusumik atuarfimmuut namminersortitamut, Nuuk Internationale Friskole-mut, aningaasaliissuteqarnissamut tunngavissiaq ajorseriassaaq. Oqaatigineqassarli, kommunit maannamut inatsisit malillugit tapiissutaasartut sinnerlugit tapiissuteqarsinnaammata.

7. Pingaarutilinnut allanut kinguneri

Inatsisissatut siunnersuut Naalagaaffeqatigiinnermut imaluunniit namminersorluni oqartussaanerup ingerlanneqarneranut tunngatillugu kinguneqartitsinngilaq.

8. Oqartussaasut kattuffiillu tusarniaaffigineqartut

Siunnersuut 2012-imi juunip aallaqqaataanit juulip arfernata tungaanut tusarniaassutigineqarpoq, tusarniaanermullu akissutit ilanngussaq 1-imi ilanngunneqartut innersuussutigineqarput.

Malugeqquneqarpoq, tusarniaanermut akissutit siunnersuummik allannguissamut tunngavissiiinngimmata. Tusarniaanermulli akissutit aallaavigalugit siunnersuummut nassuiaatit ataasiakkaat erseqqissaaffigineqarput ilaneqarlutillu.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Uani pineqarpoq, perorsaanermut tarnillu pissusaannut tunngatillugu siunnersuisarnerup kommuninut tunniunneqareenera aallaavigalugu kinguneqartitsisarnerup iluarsineqarnera. Taamaammat kommunimi tunngaviusumik atuarfiup namminersortitap najugaqarfiani

kommunalbestyrelse atuartunut tunngaviusumik atuarfimmi namminersortitami atuartunut akeqanngitsumik perorsaanermut tarnillu pissusaannut tunngatillugu siunnersuisassaaq.

Nr. 2-mut

Uani pineqarpoq, aalajangersaanissamat piginnaatitsissut atuarfimmi assersuutigalugu klassini tamani atuartut amerlassusissaat pillugu maleruaqqusanik aalajangersaanermut atorneqarsinnaasoq. Piginnaatitsissut atuarfimmi naammattumik qaffasissumik piginnaasaqartitsinissamik kissaateqarnek aallaavigalugu piginnaasatigut tunngavissat atorneqarnissaannik piunasaqaatitaqarpoq.

Nr. 3-mut

Aalajangersakkap aalajangerpaa, tunngaviusumik atuarfimmi namminersortitami atuartumut ataatsimut kommunalbestyrelsip tapiissutissaannut naatsorsuinissamat aningaasat aalajangersimasat atorneqartarnissaat. Aningaasat 2013-imi atorneqartussat 31.924,55 kr.-upput, taakku 32.000 kr.-nut akunnaallineqarput. Tassunga atatillugu paasissutissiissutigineqassaaq, aningaasat 2008-mi tapiissutigineqartut aallaavigalugit naatsorsorneqarmata, tassa inatsimmi tapiissutinik naatsorsuisarnerup suli atuunna pissutigalugu. Tunngaviusumik atuarfinnut namminersortitanut tapiissutit ingerlaavartumik ataatsimoortumik tapiissutitigut aningaasarsianut akinullu aaqqiisarnermut malinnaatinneqarnissaat qulakkeerniarlugu, kommuninut ataatsimoortumik tapiissutit aqutitigalugit aningaasarsianik akinullu aaqqiisarnerit assigalugit aningaasat ukiut tamaasa aningaasarsianut akinullu naleqqussarneqartassapput.

Taassuma saniatigut oqaatigineqassaaq, kommunalbestyrelsip aningaasat pineqartut sinnerlugit maannakkutut tapiissuteqarsinnaanera aalajangersakkap akornusinngimmagu.

Nr. 4-mut

Aalajangersagaq immikkut atuartitsinerup tassungalu aningaasaliissuteqartarnerup kommuninut nuunneqarneranut tunngatillugu kinguneqartitsisarnermut iluarsiiisutaavoq, taamaamat kommunimi tunngaviusumik atuarfiup namminersortitap najugaqarfigisaani kommunalbestyrelsip annertusisamik immikkut atuartitsinermut allatullu immikkut perorsaanermi siunnersuinerumut, atuartumut perorsaanermut tarnillu pissusaannut tunngatillugu siunnersorneqarnissamik innersuunneqartariaqarsimasumut, aningaasartuutit akilerallassavai.

Nr. 5-imut

Aalajangersagaq siunnersuummi nr. 2-mut attuumassuteqarpoq, isumaqarlunilu § 14, imm. 4 naapertorlugu nalunaarut saqqummiunneqartoq aalajangersakkanik maanna tunngaviusumik atuarfinnut namminersortitanut ajornerusumik nassataqartitsissanngitsoq, tassa inatsimmut atuuttumut naleqqiullugu.

Nr. 6-imut

Namminersorlutik Oqartussat pillugit inatsimmi nr. 473, 12. juni 2009-meersumi § 1-ip aalajangerpaa, inatsisinik atortitsineq Naalakkersuisut tigungmiaraat. Tamatuma nassataanik siunnersuutigineqarpoq, inatsimmi tamarmi oqaaseq “Landsstyret” imatut allanngortinneqassaaq: “Naalakkersuisut”.

§ 2-mut

Siunnersuutigineqarpoq, Inatsisartut inatsisaat 1. januar 2013-imi atuutsinneqalissasoq. Tamatumunnga tunngavigineqarpoq, maanna inatsisitigut inissisimanermit naapertuuttumik inatsisip piaartumik atuutsinneqalernissaanik kissaateqarnej.